

Fundacion Lanta Papiamento ta anuncia:

Presentacion di 'E Caya di Monche' den cuadro di Aña di Papiamento

ORANJESTAD – Dr. Joyce Pereira di fundacion Lanta Papiamento (FLP) a anuncia cu dos aña despues cu e periodista y autor, Benjamin Romero a presenta su prome obra bibliografico *E Negoshi di Koffie na Aruba*, diahuebs 29 di november proximo e lo presenta su di dos obra, *E Caya di Monche*. E presentacion aki lo cuminsa pa 7:30pm na Biblioteca Nacional Aruba (BNA) su sede na George Madurostraat.

Sra. Pereira a laga sa cu e buki aki ta dedica na e linguista, Ramon Todd Dandaré pero tambe na tur academico, investigador, promotor, institucion y fundacion cu ta salvaguardia nos lenga materno den cuadro di Aña di Papiamento 2018. E autor Romero a splica cu su dos obra bibliografico ta totalmente diferente un di otro. *E Negoshi di Koffie na Aruba* ta un historia di negoshi conta di un forma periodistico y *E Caya di Monche* ta un obra cu tin tres componente principal: Biografico, historico y genealogico of historia di famia y e ta conta di un forma mas literario.

E parti biografico di *E Caya di Monche* ta conta un etapa di e bida di e papiamentista Ramon Todd Dandaré, tempo di su infancia ora cu pa prome biaha Todd Dandare cu 5 aña a conoce Pepsi Cola na Aruba y tambe e ta conta parti di su epoca di hubentud den Elleboogstraat. Tambe e ta relata, entre otro, su formacion como academico y linguista, sigui pa su experticio den nos lenga materno. E parti di e biografia aki ta mara na historia y desaroyo di Papiamento como materia di estudio y investigacion academico na Aruba y nos region.

E biografia aki a wordo hinca den un contexto historico defini, rescatando echo y personahe fo'i den e bahul di olvido, asina Romero a bisa. Ta wordo relata parti di algun echonan relaciona cu II Guera Mundial. Entre otro e anecdota di tres ruman cu a bin di vakantie na Aruba y pa motibo di e menasa di e submarino Nazi dilanti di nos costa, nan a keda biba na Aruba pa henter nan biba. Awendia nan ta conoce e di tres generacion di nan famia.

Tambe con Aruba a bira un centro ideologico, politico y logistico contra e dictadura di Trujillo na Republica Dominicana. Tambe con un yiu di tera di mayornan Dominicano, Carlos Gomez Ruiz cariñosamente Carlito a bira e prome victima na Sto. Domingo di loke a wordo yama e Revolucion di April di 1965 pa restaura democracia, ora cu gobierno di Juan Bosch a cay pa un golpi militar. Tambe ta wordo conta historia di barnan y negoshinan na Playa entre nan Tienda El Gallo y La Gallina, moda di e tempo aya, musical y fiestanan entre otro recrea pa agrupacion Los Duques del Caribe.

E linguista Todd Dandaré a bisa cu e buki *E Caya di Monche* ta describi e comunidad singular multinacional y multilingual cu a biba den Elleboogstraat. Nan a comparti cu otro no solamente nan idioma, sino tambe nan cultura, tradicion, custumber, gastronomia etc. E buki ta dedica un parti riba historia di hende y famia. Igualmente ta relata un parti relaciona cu historia di nos sistema di enseñansa.

E obra aki lo ta disponibel e mesun anochi di su presentacion cu ta uno publico pa tur hende na BNA.

